



Broj:

Sarajevo, 04.11.2020. godine

PRIMLIENO:	05-11-2020	Broj:	
Organizaciona jedinica	Klasifikaciona oznaka	Redni broj	Broj prijava
01-50-1-		2162/20	

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

n/r predsjedavajućeg, gđin. Nebojša Radmanović

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

POSLANIČKU INICIJATIVU

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da najmanje jednom mjesečno dostavlja Parlamentarnoj skupštini Bosne i Hercegovine ažuriranu informaciju o stanju u Bosni i Hercegovini po pitanju pandemije koronavirusa (COVID-19), uključujući podatke o broju testiranih, zaraženih, izliječenih i preminulih na teritoriji cijele Bosne i Hercegovine, kao i poduzetim mjerama kriznih štabova na svim nivoima vlasti, te daljim mjerama koje u cilju zaštite zdravlja i života građana i saniranja ekonomskih šteta uzrokovanih pandemijom koronavirusa (COVID-19) planira poduzeti Vijeće ministara Bosne i Hercegovine, uz poseban akcent na način utroška planiranih budžetskih sredstava namijenjenih za saniranje ekonomskih šteta uzrokovanih pandemijom koronavirusa (COVID-19).

Obrazloženje

Prema članu 15. stav (2) Zakona o ministarstvima i drugim organima uprave Bosne i Hercegovine („Službeni glasnik BiH“, br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13, 19/16 i 83/17) Ministarstvo civilnih poslova Bosne i Hercegovine nadležno je, između ostalog, i za koordiniranje aktivnosti, usklađivanje planova entitetskih tijela vlasti i definisanje strategije na međunarodnom planu u oblasti zdravstva i socijalne zaštite. S tim u vezi, u okviru ovog ministarstva kao zasebna organizaciona jedinica djeluje Sektor za zdravstvo sa dva odsjeka, sa nadležnošću za ažuriranje, verifikaciju i obradu podataka za potrebe izvještavanja na nacionalnom i međunarodnom nivou u oblasti zdravstva, za pružanje stručne podrške agencijama i stručnim tijelima u oblasti zdravstva na entitetskom i državnom nivou, te za poslove u vezi saradnje i komunikacije sa međunarodnim organizacijama i tijelima u oblasti zdravstva, organima i tijelima Evropske unije, Ujedinjenih naroda i drugim međunarodnim organizacijama, a u skladu sa preuzetim obavezama BiH.¹

¹ Iz ove nadležnosti Ministarstva civilnih poslova proizilazi da je ovo ministarstvo kontakt tačka za saradnju sa Svjetskom zdravstvenom organizacijom (WHO), koja je ključna međunarodna institucija u vrijeme pandemije koronavirusa (COVID-19).

Imajući u vidu navedeno, kao i porast broja zaraženih koronavirusom (COVID-19) u Bosni i Hercegovini, kao i u skoro svim zemljama sjeverne hemisfere i najave zdravstvenih stručnjaka da predstoji teška epidemiološka situacija zbog hladnijeg vremena, dužeg boravka u zatvorenim prostorima i pojave sezonske gripe, ukazuje se naročita potreba da se u koordinaciju aktivnosti institucija na svim nivoima vlasti u Bosni i Hercegovini po pitanju odgovora na pandemiju koronavirusa (COVID-19) uključi i Parlamentarna skupština Bosne i Hercegovine, kao ustavno najviši organ zakonodavne vlasti. Osim toga, uloga Parlamentarne skupštine Bosne i Hercegovine, pored redovnog informisanja, može biti od značaja i po pitanju unaprijeđenja pojedinih zakonskih i međunarodnih akata iz oblasti zdravstva, kako bi se omogućio što bolji i sveobuhvatniji odgovor svih institucija u cijeloj Bosni i Hercegovini na novonastalu situaciju uzrokovanu koronavirusom (COVID-19).

S tim u vezi, ništa manje nije bitan ni ekonomski aspekt pandemije koronavirusa (COVID-19), te je u tom smislu neophodno da Predstavnički dom Parlamentarne skupštine Bosne i Hercegovine bude informisan i o načinu utroška sredstava Budžeta institucija BiH i međunarodnih obaveza BiH za 2020. godinu namijenjenih za saniranje ekonomskih šteta. Vijeće ministara je na 17. sjednici održanoj 01.10.2020. godine donijelo Odluku o raspodjeli 14.474.000,00 KM iz budžeta institucija BiH namijenjenih za saniranje ekonomskih šteta uzrokovanih pandemijom koronavirusa (COVID-19), a koji će biti usmjereni za zdravstveni sektor u BiH.² Pored toga, važan je značaj i uloga Koordinacionog tijela za zaštitu i spašavanje koje prema Okvirnom zakonu o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini („Službeni glasnik BiH“, broj 50/08) odlučuje o traženju međunarodne pomoći nakon proglašavanja stanja prirodne ili druge nesreće. Na kraju, realizacijom ove inicijative uspostavit će se praksa cjelovitog i službenog informisanja građana Bosne i Hercegovine o broju testiranih, zaraženih, izliječenih i preminulih, a ne kao što je to do sada bilo parcijalno, po općinama, kantonima i entitetima, što je sa razlogom izazivalo konfuziju, kako kod zainteresovane javnosti, tako i kod građana.

S poštovanjem,


Dr. Denis Zvizdić

² Sredstva će biti alocirana entitetima i Brčko Distriktu BiH, i to Federaciji BiH 61%, RS-u 37% i Brčko Distriktu 2%.